

# Uvodnik

Časopis *Novi Muallim*, sa ovim, 57. brojem, ulazi u petnaestu godinu postojanja. U ovoj godini Udruženje ilmijske Islamske zajednice u Bosni i Hercegovini već je poduzelo određene napore i korake ka unapređenju uređivačke koncepcije kao i na uključivanju novih članova Redakcije, koji će, prema našem uvjerenju, sa svojim iskustvom i znanstvenim referencama, značajno doprinijeti podizanju uređivačkih, sadržinskih, metodoloških i naučnih standarda časopisa. U ovoj godini Redakciji časopisa pridružena su dva nova člana: dr. Armina Omerika i dr. Ermin Sinanović.

Naši redovni čitaoci primijetiti će da je ovaj broj dobio i novi grafičko-tehnički izgled, koji će imati i pobornike i osporavatelje, ali naša je nada da će napor koji smo uložili biti primijećen, a osvježeni izgled časopisa prihvaćen.

Sadržajno, *Novi Muallim* nastavlja se baviti pitanjima, temama i problemima koji su od značaja za našu čitačku publiku, akademsku zajednicu u Bosni i Hercegovini, ali i širu javnost. I u ovom broju, u rubrici "Muallimov forum" dotičemo se, najaktuelnije teme ovog proljeća u Bosni i Hercegovini, protesta bosanskohercegovačkih građana, genealogijom i širom slikom tzv. "dešavanja naroda" i narodnog nezadovoljstva od Egipta, preko Ukrajine do Bosne i Hercegovine. Tekstovi, koje ćete imati priliku čitati u ovoj rubrici, rezultat su kolokvija koji je o ovoj temi organizirala naša Redakcija u martu ove godine, na Fakultetu islamskih nauka u Sarajevu, kao pokušaj akademske i islamske zajednice da se odgovorno pozabavi ovim, vrlo složenim, fenomenom. Ovom, ali i drugim aktuelnim temama, bavili smo se i u intervjuu sa prof. dr. Kasimom Trnkom.

U rubrici "Putokazi" objavljujemo tekst dr. Dževada Hodžića pod nazivom *Dijalog: epistemološko, teološko, etičko i hermeneutičko značenje međureligijskog dijaloga u znanstvenotehnološkom svijetu*.

Tekst o islamom motiviranim nevladinim organizacijama i udruženjima te njihovom odnosu s Islamskom zajednicom, s posebnim osvrtom na nedavno usvojenu Platformu o saradnji Islamske zajednice sa organizacijama islamskog određenja, možete čitati u rubrici "Sagledavanja". U istoj rubrici donosimo i vrlo zanimljiv tekst pod nazivom *Islamska zajednica u BiH iz perspektive mladih*.

S obzirom na to da se ove godine obilježava stotinu godina od Sarajevskog atentata, u ovoj rubrici imate priliku čitati o reakciji na taj događaj predstavnika Islamske zajednice u bosanskohercegovačkoj štampi.

Zbog specifičnog zanimanja za teme o obrazovanju i odgoju u predškolskim ustanovama, osnovnim i srednjim školama, vojsci i drugim ustanovama i institucijama, rubrika "Muallim" i dalje sadrži one tekstove koji ta pitanja primarno obrađuju. U ovom broju donosimo tekstove *Muhammed, alejhis-selam, u udžbenicima Islamske vjeronauke za srednju školu* i *Podrška djeci s poteškoćama u učenju u redovnim školama*.

Od ovog broja *Muallima*, redakcija se odlučila na drugačije predstavljanje hutbe i vaza. U rubrici "Islamske teme", u svakom broju objavljujivat ćemo hutbu i vaz, bez recenzija hutbe koje su dosada bile sastavni dio rubrike "Muallimova hutba". Za ovaj broj donosimo hutbu Izet ef. Čamdžića i vaz r. Kasim ef. Dobrače.

Vašoj pažnji preporučujemo i tekstove: *Reisul-ulema Čaušević – borac za ljudska prava, Vrijedan rukopis Kur'ana u džamiji Mehmedbega Stočanina* i *Hadži Džaferova – Lipanjska džamija u Gračanici* iz rubrike "Historija obrazovanja" te tekst *Naravi tragedije u romanima Nedžiba Mahfuza* koji objavljujemo u rubrici "Esej".

U rubrici "Pregled" predstavljamo niz značajnih naslova iz svjetske i domaće literature.

I na kraju, na stranicama koje su pred Vama, objavljujemo i nove *Upute za autore*, koje preporučujemo pažnji svih koji imaju namjeru u narednom periodu slati svoje radove za objavljivanje.

Senada Tahirović